

doute de la resurrection, & d'estre assemblez deuant luy pour estre iugez, certainement Dieu sçait tout.

*LE CHAPITRE DV CONSEIL,
contenant cinquante-trois versets,
escriit à la Meque.*

AV nom de Dieu clement & misericordieux. Dieu est Prudent, Sage, Magestueux, il entend tout, il est tout-Puissant, Dieu t'a enuoyé les mesmes inspirations qu'il a enuoyez à ceux qui t'ont precedé, il est tout-Puissant & Sage, tout ce qui est au Ciel & en la Terre est a luy, il est tout-Puissant & sçait tout, les Cieux s'ouurent par son commandement, les Anges exaltent sa gloire, & luy demandent pardon pour ceux qui sont en Terre, il est misericordieux, il voit ceux qui inuoquent les Idoles, il les cognoit tous, mais tu n'es pas leur tuteur; Nous t'auons inspiré l'Alcoran en langue Arabesque, pour prescher les habitans de la Meque, & ceux qui habitent a l'entour de cette ville, nous t'auons enuoyé pour leur prescher le iour du iugement, il n'y a point de doute qu'une partie des hommes sera sauuee, & que l'autre sera damnée, si Dieu eust voulu, il les auroit creés d'une mesme Religion, il donne sa grace à qui bon luy semble, & les infidelles seront priuez de secours, parce qu'ils ont demandé la

protection des Idoles, mais Dieu est le véritable protecteur du monde, il ressuscite les morts, & est tout-Puissant, il iugera vn iour toutes les difficultez, & resoudra les doutes que vous auez de vostre Religion, il est mon Seigneur, ie me suis resigné à sa diuine volonté, il a créé vostre espouse de vous-mesmes, il a créé tous les animaux males & femelles, & vous a fait multiplier; il n'y a rien qui soit semblable à luy, il tient les clefs des tresors du Ciel & de la Terre, & oste & donne le bien à qui bon luy semble. La loy que j'ay donnée à Noé, à Abraham, à Moïse & à Iesus, est celle que ie t'ay ordonné d'observer; à sçauoir de croire en vn seul Dieu. Les infidelles se faschent quand tu leur presche l'vnité de Dieu, il l'enseigne à qui bon luy semble, & conduit au droit chemin ceux qui luy obeissent, les meschans approuuent vne partie des poincts de sa loy, & abiurent les autres, encore qu'ils ayent cognoissance de son vnité, & ce par enuie qui est arriué entr'eux, si ton Seigneur n'auoit cy-deuant dit qu'il differe leur punition au iour du Iugement, il les auroit desia tous exterminés, plusieurs de ceux qui apre eux seront heritiers de la cognoissance des escritures douteront de sa loy; mais suis le chemin qui t'a esté ordonné, & ne suis pas leurs appetits; Dis leur, ie crois au liure que Dieu a enuoyé, j'ay receu commandement de vous prescher que Dieu est vostre Seigneur & le nostre, vous respondrez de vos actions, & nous respondrons des nostres, il n'est pas necessaire de disputer entre nous,

Dieu nous assemblera vn iour en sa presencé pour iuger nos differens , il est nostre refuge , ceux qui disputent contre la foy apres auoir cognu la verité, sont sans raison, leurs argumens seront inutiles auprès de Dieu, ils seront l'obiet de sa colere, & souffriront de tres-grandes peines. Dieu a enuoyé l'Alcoran avec la verité & la balance ; il ne t'enseignera pas en quel temps sera le iour du Iugement ; ceux qui ne le croyent pas demandent quand il viendra, & ceux qui le croyent ont peur de sa venuë, & sçauent qu'elle est infailible, ceux qui en doutent sont deuoyez du droict chemin; Dieu est misericordieux à son peuple, il enrichit qui bon luy semble, il est fort & tout-Puissant, il augmente les graces de celuy qui est desireux des biens du Ciel, il donne les biens de la terre à celuy qui les ayme, & le priue des biens du Ciel; Y a-t'il des Impies entre les hommes qui leur enseignent vne fausse Religion prohibée de Dieu? Dieu ne la leur a pas enseignée, s'il n'auoit differé leur punition iusques au iour du Iugement, il les auroit desia exterminé, à la fin ils ressentiront de rigoureuses peines, vous les verrez auoir peur de leurs deportemens, vous les verrez chastier selon leurs demerites, & les fideselles qui font de bonnes œuures iouïront des delices du Paradis où ils trouueront tout ce qu'ils desireront; c'est la grande grace de Dieu; c'est ce qu'il a annoncé aux fideselles qui ont crû, & qui ont fait de bonnes œuures; Dis leur, ie ne vous demande point d'autre recompense de la peine que ie prends de vous

prescher, que d'aymer mes parens, celuy qui fera quelque bonne œeuure en sera recompensé, Dieu est misericordieux, & les bonnes œeuures luy sont agreables; Diront ils que tu as blasphemé contre Dieu, si Dieu veut il t'empeschera d'oüir ce discours, où il imprimera la patience dedans ton cœur, il efface le mensonge, & confirme la verité par ses parolles, il sçait tout ce qui est dans le cœur des hommes, il agrée la conuersion de ses creatures, il leur pardonne leurs pechez, & sçait tout ce qu'ils font, il exauce les prieres des fidelles qui font de bonnes œeuures, & augmente sa grace sur eux, mais les infidelles ressentiront les rigueurs des peines eternelles. Si Dieu eust enrichi egalemēt toutes ses creatures, elles auroiēt esté en confusion sur la terre, il enrichy qui bon luy semble, il void tout & sçait tout, il enuoye la pluye lorsque les hōmes desespérēt de sa grace, il est protecteur des fidelles, & loüange luy est deuë eternellement; la creation des Cieux & de la Terre, & de tout ce qui se meut entr'eux, est vn signe de ta toute-Puissance, S'il vous arriue du mal, croyez que vous l'auuez meritē, neantmoins il vous pardonne beaucoup de choses, vous ne pouuez pas euitter sa punition en terre, & personne ne vous peut proteger contre luy, le vaisseau qui court sur l'eau gros comme vne montagne est vne marque de sa toute-Puissance à ceux qui perseuerent en sa loy, & qui sont recognoissans de ses graces; il reprendra les impies de leurs pechez, & en pardonnera beaucoup, ceux qui disputent contre

Ses commandemens ne peuuent pas éuiter leur punition ; les biens que vous possédez sont les biens de la terre, les biens que Dieu donnera à ceux qui se confient en luy seront éternels, Ceux qui s'esloignent des pechez mortels, qui se repentent de les auoir commis, qui demandent à Dieu d'estre exaucez, & perseuerét en leurs prieres, ceux qui prennent conseil & consultent entr'eux ce qu'ils doiuent faire, qui dependent en bonnes œuures vne partie du bien que Dieu leur a donné, qui luy demandent secours en leurs afflictions, ceux qui font bien & ceux qui font mal seront recompensez, & punis selon leurs œuures, Dieu n'ayme pas les infidelles, vous n'avez point de pouuoir sur ceux qui luy demandent secours en leur affliction & qui se conuertissent, vostre pouuoir s'estend sur ceux qui font iniustice au peuple, & qui desobeissent en terre aux commandemens de sa diuine Majesté, ils ressentiront de grands tourmens. Ceux qui perseuerent à bien faire, & qui pardonnent à leur prochain, font ce que Dieu a ordonné, celuy que Dieu deuoyera ne trouuera personne qui le conduise. Tu verras que les infidelles demanderont si on peut retourner au monde quand ils verront le feu d'Enfer tu les verras fuir avec vne extreme peur d'vne éternelle ignominie, ils regarderont l'Enfer de trauers, & les fidelles verront que les meschants qui ont perdu leurs ames, qui ont deuoyé leur famille, & tous les impies, seront éternellement damnez, personne ne les pourra sauuer, &

celuy que Dieu deuoyera ne trouuera pas le droit chemin ; Dis leur, demandez pardon à Dieu avant que le iour vienne que vous ne trouuerrez point de chemin pour retourner au monde, n'y point d'excuse de vos pechez ; S'ils te desobeissent nous ne t'auons pas enuoyé pour estre leur tuteur, tu n'es enuoyé que pour les prescher. Lors que nous donnons quelque prosperité à l'homme il s'en resioiit, & lors qu'il luy arriue de l'affliction il est ingrat de la grace de son Seigneur Roy des Cieux & de la Terre. Dieu donne des enfans fils & filles à qui bon luy semble, il rend steriles celles que bon luy semble, il sçait tout & est tout-Puissant, il ne parle à l'homme que par inspiration & par parabole sans estre veu, il enuoye ses Prophetes & ses Apostres auxquels il inspire ce que bon luy semble, il sçait tout & est tout-Puissant: Ainsi nous t'auons enuoyé nostre esprit pour t'enseigner nos commandemens, tu ne sçauions pas auparauant, ce qui estoit escrit dans l'Alcoran, ny les mysteres de la foy, nous tel'auons enuoyé pour seruir de lumiere au monde, ie conduiray au chemin de salut qui bon me semblera, ie le conduiray au chemin du Seigneur, à qui appartient tout ce qui est au Ciel & en la Terre & qui dispose de toute chose.